

LONDON. MEDICAL  
SOCIETY

TRACTATIONIS  
DE  
ARTICVLIS LIGAMENTIS  
ET MVSCVLIS INCESSV

DIRIGENDIS

S V P P L E M E N T V M

TABVLAMQVE NOVAM

PLANTAE HVMANI PEDIS

EXHIBENS

AD ANATOMEN PVBLICAM  
CADAVERIS MASCVLINI

*D. XXIV. NOVEMBR. M DCC XXXI. ET SEQV.*

HORA POMERID. II. IN THEATRO ANATOMICO

SPECTANDAM

RECTOREM ACADEMIAE MAGNIFICVM,

ILLVSTRISSIMOS COMITES,

VTRIVSQUE REIPVBLICAE PROCERES,

ET GENEROSISSIMOS AC NOBILISSIMOS CIVES,

OMNESQVE ANATOMES STVDII

FAVTORES

OFFICIOSISSIME INVITAT

AVGVST. FRIDER. WALTHERVS

ARCHIAT. REG. ET PROF. PVBL.

---

L I P S I A E

LITERIS IOAN. CHRISTIANI LANGENHEMII.





EXERCITATIONE ANATOMICA  
PLANTAE PEDIS HUMANI  
TENERIORES MUSCULOS  
INTEROSSEOS  
ATQVE  
LIGAMENTA OSSIVM  
CLARIVS DOCET,  
TABVLAM VERO NOVAM  
TRADIT  
AVGVSTINVS FRIDER. WALTHERVS

---



Exhibet vulgaris humani pedis anatomie, tam vasorum, quam musculorum, facile obuiorum, tendinumque prospectum; sed curatior, abditos interosseos musculos, perinde, ac notabiliora vincula ossium compaginatorum docet; etiamsi haec pinguedine, aut membranis condita sint, pluribusque de causis, et admodum aegre, cultro anatomico discernantur. Quem nos ossium, rerumque plurium, et ipso vitae usu dirigendarum, saepeque in valetudine hominum aduersa dolentium, et male adfectarum, scrupulosius rimari nexum coepimus *Tractatione de articulis, ligamentis, et musculis incessu dirigendis*. Sed, inter alia, earundem rerum omnium, praesertim in planta pedis altiore consistarum, et, communiter ab anatomes Scriptoribus neglectarum, tum maiorem esse numerum, diuersumque

A que



que prospectum cognouimus, quam, ut cuncta, pro dignitate explicarentur, ac l. c. minori Tab. II. et, quantum expediebat, icone adparerent oculis; nedum, ut sublimioris, scilicet, minus ita motis e suis sedibus, peronaei longi, et tibialis postici, musculorum tendinibus, nihilo minus interstinctae pedis plantae omnis loca, repraesentari eodem tempore, ac luculenter satis exhiberi possent. Quare iteratum nostrum, nouumque desiderari laborem intelleximus, quo secundum naturalem omnium ordinem, ac pedis, plantaeque longitudinem, ita vero magis perfecte in lucem prodirent, unoque propemodum obtutu prospicerentur, quaecunque demum natura in interna pedis planta connexuit, et occultauit. Quae, sicuti abscondita satis haerent, neque sine labore exiguo anatome reteguntur, et clarius notantur: ita maiori sollicitudine, studioque, cuncta delineantur, et in aes inciduntur. Verum, nos plurium interosseorum musculorum arctior nexus: deinde vero insignior rerum distinguendarum numerus, ac grauiiores aliae mouerunt causae, ut picturam sicci, arteque anatomica elaborati humani pedis, secti recens iconi, et quidem huius causa expositionis, praeferendam, addendamque hoc loco putaremus; recentis enim uero anatomicen, quantum refert, modo verbis declaraturi: istius vero luculentio rem tabulam sicci pedis, simul, et cum cura exhibitori. Quare obseruationes, e nouo sectionis exemplo iam conferendas, tabulamque adiectam, ad illa, quae in hoc genere nuperrime conscripsimus, pariter accommodare diligenter studebimus; alia quippe iam dilucidaturi, non nulla uero suppleturi, denique quaedam emendaturi.



Eminent sub metatarso interossei septem muscoli, *Musculi interossei septem declarantur.* et omnes, hoc inferiori plantae pedis loco vix minori discernuntur labore, quam quidem in manibus, ac metacarpo, eiusdem cognominis sex alii cognoscuntur, et accurate distingui solent. In eo autem intervallo, quod est inter os metatarsi, quod pollicem sustentat, et inter id, quod primum digitum fundat, tantum interosseus primus habetur; et hic crassior prae reliquis musculus est, atque originem tendinosam ab cuneiformi osse primo, et eius, perinde, ac secundi ossis metatarsi capitis inferioris commissurae loco accepit; deinde, ubi ipse progreditur, tunc ad latus internum secundi metatarsi ossis, in pede deuexo, tanquam ad propriam sedem, adnascitur, longeque minus ita, ad primi ossis, quod opponitur, latus adhaeret; ac tandem is, ante caput metatarsi ossis, quod ad indicem pertinet, ampliorem tendinem, validioremque mittit. Atque hic tendo, latiore aponeurosi, cum orbiculari indicis articuli primi ligamento, pariter, cum obductione illa transuersa, ac membranosa, quae his locis veluti luxuriare in serie articulorum solet, confunditur, atque in primum indicis os, ab latere quidem interno, definit: ut validius regere digitum, perinde, ac defendere articulum, ipse tendo et musculus videantur. Deinde, in numero, tam internorum, quam externorum, sed alterne ita conferendorum musculorum, alter, et externus, iam commemorari debet. Et, quemadmodum, prior ille musculus primum digitum versus pollicem, in viuis conuertit; ita alter, et, quo de nunc dicemus, ab latere externo eiusdem digiti, latiore quoque tendine inseritur; quem quippe digitum ipse ab pollice, in viuis abducit; sed, nisi nos omnia fallant, tam erit in horum duorum,



quam reliquorum omnium officio muscutorum, quod praestant, simul animaduertendus quidam digitos, etiam magis directe, flectendi modus. Igitur secundum ossium, in metapedio, interuallum, superne secundus implet interosseus musculus. Qui, vix altera sui parte, inter os metatarsi secundum, tertiumque demittitur, ac prominet; e quorum etiam ossium commissura capitum, tendinosus, et ita porro carnosus: in primis vero, ex latere ossis metatarsi secundi externo, ipse prodire videtur. Id ita fieri animaduertitur, sicut in pluribus manuum fingendis, interosseis quoque, res accidit; scilicet, ut ex duobus fere locis, oppositisque ossium lateribus, carnosae fibrae, et singulari flexu oriantur, ac confluant; vnde in superiori pede sic pronasce, hic quoque musculus obseruetur. In ossium metatarsi secundo interuallo, perinde, ac tertio, et quidem superne, singulare, ac tendinosum velum, ab secundo, et tertio cuneiformi osse prodit; et idem fila intexta vtrinque profert, musculumque secundum, et quartum contegit, ac firmat. At interosseus modo tertius musculus, partem sui praecipuam demittit; et haec eius pars, ita quidem sub tertio metatarsi osse, et ab latere eius interno visa, etiam cum musculo vicino, seu quarto, communem ex parte originem, inferius habet. Nam posteriori in pedis planta loco, et ab ligamento transuerso, ac iuxta sedem priorem musculi, antithenar dicti, uterque musculus, tertia circiter longitudinis parte, intermedia, veluti linea tendinosa, atque communi coniungitur: reliqua autem parte, tertius ipse musculus, scilicet sub priore, ut modo diximus, et ab latere interno, perinde, atque ab concaua parte tertii ossis metatarsi natus, procurrit, ac demum angustior tendinem anterie fecit, qui inuoluitur membranoso



noso articuli vinculo digiti secundi, siue medii, et eiusdem ab digiti latere interno, et in primo osse, inseritur. In tertio ossium metatarsi interuallo, prope similis, ac secundi, est quarti positus interossei, externique; sed pars eius, quae in planta visitur, ea longior adparet, et, praeterquam quod haec cum tertio coit, sicut ante notauimus, etiam superne, ab latere ossis metatarsi tertii, et quarti, atque ita supra quintum interosseum, is porro musculus prodit. Iam quintus, et sextus musculus, sicut de tertio, et quarto monuimus, ope intermediae, tendinosaeque lineae, admodum in exemplo cohaerent; qua etiam parte, ab vagina tendinis peronaei musculi vterque prouenit. Itaque secundum digitum quartus musculus extrorsum dirigit: verum quintus, cum ab parte inferiori, latereque interno ossis quarti metatarsi, sed infra praecedentem oritur, tum introrsum istertium digitum mouet. Atque hi quinque musculi paulo altiores in metatarso sedes, prae interosseis duobus reliquis habent; nec nisi quintus, ad maiorem longitudinem eorum musculorum, qui sequuntur, propius accedit. Proinde sextus iam denuo vocandus externus erit, et post primum musculum ipse crassior prae ceteris habetur; sed tantum is ab externo latere ossis quinti metatarsi suam originem habet; siquidem, sine fibrarum laceratione, idem ab latere opposito quarti ossis externo, separatur; neque ita fibris, ex vtriusque latere ossis confluentibus componitur. Sed praeter ea, peculiarem quoque, tendinosamque sui originem, inferius, hic musculus, ab peronaei tendine musculi, in exemplo; sed saepius ab vagina ipsius eduxit: atque de reliquo, etiam in progressu, noster spatium superne, inter duo ossa visum, pro more quarti, et secundi, ex-



ternorum musculorum implet; scilicet, quod inter os metatarsi quartum, et quintum est; denique vero, iuxta articulum, ipse in tendinem teretem, et robustum abit, digitumque tertium ita extrorsum mouet. De septimo autem interosseo patet: eum sub priori, et osse quinto confitum esse, et fere oriri, quemadmodum de quinto, et tertio musculo nos ante retulimus. Verum, prae his saltem crassior ipse septimus, partem sui principii tendinosam, inferius, et iuxta sextum musculum, ab vagina peronaei tendinis acquirit, de reliquo is pergit, et conformatum tendinem, sicut alii interni agunt, etiam ab latere minimi digiti promittit, eundemque ultra primum articulum plantat. Atque in vagina quoque, laudati peronaei tendinis, etiam, quodammodo ventrem, quem alii vocant, priorem, musculi illius, ex parte, finem sui tendinis consequi, qui minimum abducere digitum vulgo dicitur, ita, quidem est visum. Verum, de toto hoc musculo abductore magis discrete sentimus, et posterioris partis tendinem explicari animaduertimus; quippe, qui lata productione sui, priorem vulgo ventrem dictum contegit. At vero, si anatome, et cum cura haec obductio auferatur, tum carnem subiectam in duas distingui partes manifesto adparebit: quarum una inferius, in vagina illa peronaei tendinis, exigueque in osse externo radicitur, inde vero procedit, et minimi digiti, proximo osse, et quidem medio loco, ac supra articulum inseritur, illumque flectere digitum putatur; sicut Cl. HEISTERVS obseruauit. Ab externo autem pedis loco continuatur altera pars; quae neque magis musculum abductorem ita digastricum facit, quin potius integrum, et carne sua ad priora prolatum loca, neque vero tendine  
medio



medio interstinctum, videndum praebet. Superest, hac tractatione neque negligendus, transuersus C A S S E R I I musculus. Et hic, propter peculiarem positum suum ita nuncupatur, tendinemque unum accipit ab externo osse sesamoideo articuli pollicis, arctequae tum ad tendinem adductoris, et ad orbiculare vinculum adhaeret; hinc vero carnosus recedit, et ventre rotundo, et oblongo, sub capitibus ossium metatarsi transuersim progreditur, deinde tendinosus denuo in orbiculare quarti digiti ligamentum desinit; nihilo minus, quaedam tendinis pars, ad quintum usque articulum, eiusque orbiculare ligamentum, in hoc nostro exemplo producit: quod vero aliter, et quidem de carnosis fibris, quippe eo pariter porrectis, DOUGLASSVS adnotauit.

Atque in planta pedis auferantur anatome, quaecunque prospectum rerum, modo declarandarum, prohibent; inter quae etiam muscoli pollicem flectentis tendo longior est. Cuius quoque tendinis vagina  $\pi$  *Ligamenta articuli pedis communia et propria in primis ab parte interna et posteriore visa, cum Tabulis tractat. citat. iterum comparantur.* Tract. de articulis et ligamentis Tab. II. inferius, sed sub capite tali ossis  $\epsilon$ , fibrosa et ligamentosa visitur; fibrisque, ab osse nauiculari, ad calcis os, et versus  $\kappa$ , oblique antrorsum directis constat. Verum haec vagina externe, ab transeunte ligamento H paratur, cum hoc ab calcanei ossis posteriore, et excauata parte, vbi calx educitur, oblique prouenit; quandoquidem idem vinculum, extuberanti posteriori tali ossi, anterieus vero, tuberi calcanei interno, adhaerescit: deinde, hoc vaginam tendinis tibialis musculi postici, et vicini, perforantis dicti, ex parte struit, atque ita desinit. Verum posteriori loco id quoque surgit, et necitur cum latere postico interni malleoli, ac magis tum crassum



sum fit, et firmum. Post vaginam, quam modo diximus, et loco proximo, ad ossis tali later, calcisque tuber, scilicet, ab inferiore malleoli parte, ligamentum aliud I demittitur. Quod aequè cartilaginofum, et tenax est, ac H quidem, propter malleoli posteriorem partem esse cenfetur. Atque tendo tibialis postici mufculi, eiusdemque vagina, hoc ligamentum I ab H fatis diftinguit, et praeter ea, robore quoque fuo, idem I ab priori K ligamento difcernitur; etiamfi hoc vltimum, de reliquo quidem, non nifi tenuior iftius continuatio, fed amplior, etiam ideo potiffimum facta, effe videatur, vt ab omni priore parte malleoli, tibiaeque, K vinculum excurreret, et articulum defenderet. Igitur vinculum K cartilaginem illam fibrofam, quae latius fuper tali offis ceruice, deinde calcis tubere, et denique nauiculari offe, hac parte funditur, tum obducit, et caute, in anatome inde diftinguitur; quippe eandem cartilaginem hoc vinculum K verfus malleolum A adstringit: licet de reliquo, et fuperius, ad vsque annulare verum Tab. III. L, quod quippe inuoluit, idem continuetur. Quare L, ab I, et K vinculis, fua infigniore longitudine, teretique magis forma, aliterque differt; et ideo nos *Tract. de ligamentis* tres quoque has partes, in vnum, licet malleolum definentes, diftinximus. Atque haec fere difcernuntur vincula, ab parte tibiae articuli, et tali offis, calcisue interna: verum, a parte posteriori, fingularis est H ligamenti continuatio, et nexus. Nam idem, ab parte articuli pedis posteriore l. c. Tab. IV, faltem fub talo, ad vsque later extenditur oppofitum, et in ligamentum VI. definit; fed ita quodammodo fecus ducitur, atque res l. c. delineari icone commode potuit. Igitur H pariter furgit, faciemque offis tali

poste-



posteriorem, et crassiora vincula VIII, atque IX, post Achillis chordam, scilicet, tanquam eo continuata, ac tenuior obductio occultat; et eius fibras quasdam, partim per decussim, ab vno angulo, latereque, ad oppositum, partim vero aliter ferri, et ad oppositos tendere malleolos constat. Ex quo iam ratio patet, quamobrem V. et VI. ligamenta, licet ad H, quodam iure pertineant, quoad cum illo, ac prioribus, vices orbicularis, et ab periosteo nati, saltem fibrosa cartilagine, crassitieque, varie aucti vinculi gerunt, neque tamen penitus easdem vices explent, tractatione citata nos discernenda statuerimus. Ad illorum igitur numerum teres, et crassum accedere posset, quod n. V. l. c. indicatur ligamentum; sed, hoc crassitie ab omni H quoque vicino differt, sicut euidenti etiam modo ab n. IV. deuiat, neque adeo cum alterutro, anatome confundi debet. De vinculis communibus articuli pedis si dispiciatur, tum aliter omnino sentiendum erit. Nam articulum laxè magis tenet, quam, vt ad munus ligamenti orbicularis, licet e pluribus, et ita distinctis vinculis fingendum id esset, commode accedat, quale quidem n. XV. videndum sistitur; neque vero id ab membrana muscutorum communi, saltem hac parte ossi magis adhaerescente, et pingui differt. Sigillatim, aliud n. IV, tali articulum tibiaeque ossis, nonnisi secundum alia roborat: sicut pars ligamenti XIV, deinde aliud XVI, post propria magis vincula, malleolum vtrinquenectere videntur. Itaque, ante ligamentum Tab. IV, num. V, seu ante g, Tab. III, quod quidem ab K melius, atque icone tum vmbraque factum est, discerni debet, loco articuli quidem priori, et tertia propemodum totius ambitus parte, modus ille consuetus plurium articulorum deficit; scilicet, quo concludi orbicularibus



vinculis ossa solent, et colligantur. Neque aliud ligamentum hoc interuallo habetur, quam angustum, sed longius illud L, de quo ante pariter locuti sumus. Omnia vero, si attentis ita cernantur oculis, tum ligamentosas tot productiones, atque tam diuersa ossium connexorum frena, vinculi in locum simplicis, et omnem articulum tibiae, et tali, deinde calcis ossis, exquisitius uestientis, vel ideo esse concessa, ac mutuam cuncta sibi denique ferre operam, in gressu hominis intelligitur, vt tali quidem ossis caput, in nauicularis sinu ossis, facile, sed tuto conuertatur. Qua porro occasione monemus: ligamentum, quod Tab. III. cum L m. nequitur, et in altiore sinu adumbratur, ad ossis tali ceruicis originem, posteriori magis loco, erigi, et abscondi; ceteroquin conditum pinguedine, robustumque vinculum. Denique ad hanc doctrinam addimus: ligamenta n, et o, saepius ita minus diuisa obseruari, atque ea l. c. visuntur.

*Ligamenta  
in planta  
pedis porro  
visa discer-  
nuntur, et  
cum Tract.  
citata, no-  
uaque ta-  
bula com-  
parantur.*

Iam de ligamentis, in planta visis, scilicet, vbi tendo tibialis muscoli postici in naturali situ adhuc reperitur, sermo erit. Nam, passim aliter quodammodo de his rebus modo acturi sumus, atque *Tract. de Ligamentis* olim fecimus, quod ibi, Tab. II, tam tibialis postici, quam peronaei reclinatus tendo muscoli adpareat: nihilominus efficiemus, ut cum illis, quaecunque modo dicturi sumus, facile admodum conciliari cuncta possint. Quare tendo Q, ante vaginam O, et anteriori loco, quam quidem ipse diuiditur in partes, ad se quasi conuergentem, vicinumque, posteriorem pollicis tendinem flexoris muscoli brevis P habet, qui super osse cuneiformi tertio, cum parte U vere coit. Cui enim vero vinculo teres ille tendo superadditur, et pergit ad priorem ossis nauicularis partem, tendinisue tibialis postici veluti truncum;



cum; neque tamen ita ad calcis usque tuber iste cedit, sicut plures de huius flexoris origine brevis muscoli scriptores arguerunt. Nam post coniunctionem cum U, tendo sinum transit plantae longiorem, viaque obliquiore, sed ita altiore loco fertur, quam quidem aliud ducitur, quod potius eundem in via decussat ligamentum W. Monemus obiter: paulo etiam tenerius W esse, quam Tab. II. l. c. id pingitur. Ab illo loco, vbitendo brevis flexoris muscoli pollicis cum U parte conuenit, porro digitum circiter iste profertur; ac demum in carnem abit. Verum tendinis tibialis postici muscoli partes, in praesenti exemplo, scilicet S, T, \*, et U cognitae fuerunt. Atque aliud vinculum X, obscuriore loco oritur, ac iuxta cuneiforme tertium os procedit, et ad secundum cuneiforme, perinde, ac ad caput ossis metatarsi secundi inde diuertit, et haec ossa nequit. Etiam *Tract. cit.* δ est ligamentum, quod tendo peronaei muscoli, ipsumque os, quin videatur, noua tabula nostra prohibent; et tale primi, ac secundi ossis cuneiformis, et quidem in sinu reconditum erat in exemplo vinculum; alioque, simili, metatarsi os secundum quoque ad primum cuneiforme adstringebatur. Atque longum calcis ligamentum λ, tam eminentem vaginae partem peronaei tendinis, circum cubiforme os efficit, quam productione sui, veluti lamina, tendinosae hic visae antithenar muscoli superficiei, late adhaeret, et in eam desinit, fere sicut de ζ vinculo *Tract. cit.* diximus. Deinde, peronaei tendinis ligamentosae, inferior vaginae pars, iuxta, et post ligamentum ε, perinde, cubiforme, ac tertium os cuneiforme, denique ossa metatarsi iungit. Quo spectare propemodum videtur ligamentum, quale υ est; triumque circiter linearum inde interuallo, ac posteriori adeo loco, pariter




aliud ligamentum discernitur, quod ab osse cubiformi transit ad cuneiformis tertii latus, et accessione alia lati calcis ligamenti  $\mu$  *tab. noua* augetur. De transuerso ligamento  $\epsilon$  addimus: eius angustiores quodammodo dimensionem communiter videri; et paullo prioriloco ab tubere ossis metatarsi extimi id prouenire, quam quidem *Tract. citat.* Tab. II. ipsum educi, ac finiri videtur; quandoquidem, super commissuris trium metatarsi exteriorum ossium, e quibus quartum, et quintum, osse cubiformi insistant, idem transire; sed sub musculo interosseo sexto, et septimo, atque sub duobus minimi digiti musculis proferri animaduertitur. Atque haec omnia, sub tendine peronaei, et sublatis musculis exterioribus interosseis, ac postquam aperta, pars vaginae tendinis superior fuit, pernoscere anatome licet. Duplicem quoque partem, posterius, antithenar musculus habet; et quidem amplior vna, ante ligamentum transversum, tendine suo definit: contra, ad vaginam peronaei tendinis altera, angustiorue pars musculi pergit; ab cuius posteriori vaginae latere, inde factus alter quoque, ac distinctus tendo radicitur. Sub longo calcis ligamento, et iuxta idem oritur, atque procedit, latum aliud  $\kappa$ , calcis, plantaeque ligamentum. Quod hoc magis panditur, quo breuius idem est; quippe cubiformi, cum latere calcis ossis connectendo, capiendoque isti, ab parte interna destinatur; inde vero quodammodo etiam ad loca vicina, e. g. ad os cuneiforme tertium pergit, imo pluribus insinuatur ossium commissuris, et ad eorum latera ossium cedit, quae magis visui se subduxerunt. Partitiones tendinis peronaei in exemplo fiunt, sicut Tab. II. l. c. eae cognoscuntur; et pars  $\alpha$  interosseo primo innectitur musculo, et ita procedit. Tandem ligamentum  $\zeta$ , quod etiam transversum diximus, id neque

Tab.



*Tabula plantae humani pedis interosseorum  
musculorum, et ligamentorum, arte  
distinctorum, et siccorum.*









Tab. II, neque noua pingi satis potuit; sed membranofam, hoc quidem loco, ac pinguem, et ampliorem, perinde, atque ligamentofam notat obductionem, primorum scilicet musculorum interoffeorum: deinde vero ipsum decliue visitur, et capitum metatarfi ossium, commissuris insinuatur; itaque omnium, aliter compactorum, exigue nexum id augere existimatur.

## Tabulae plantae pedis humani interoffeorum musculorum, pluriumque vinculorum, arte anatomica distinctorum, et siccorum, breuis expositio.

A *Malleolus tibiae internus.*

B *Fibulae os*

C *Facies ossis tibiae posterior*

D *Protuberantia tibiae ossis*

\*\* *Tuber tali ossis*

E *Chorda Achillis*

F *Ligamentum plantare reflexum subcutaneum*

G *Vaginae, tibialis musculi postici, et perforantis, tendinum pars, tanquam continuatio ligamenti H visa, et, quae ad tali ossis tuber adhaeret.*

H *Ligamentum tali ossis calcisque internum, sub quo tendo flexoris, longi pollicis musculi, per viam L progreditur.*

I *Tibiae malleoli et tali ossis, calcisue, seu pedis articuli ligamentum rectum internum.*

K *Pedis articuli ligamentum obliquum internum.*



**L** *Vaginae species, per quam ducitur tendo flexoris, pollicis longi musculi.*

**M** *Tuber calcanei ossis internum.*

**N** *Cartilago fibrosa, quae tali ossis ceruicem, et calcanei internum tuber, perinde ac naucularis ossis superficiem connectit.*

**O** *Via Tendinis tibialis musculi postici Q, e naturali situ reclinati.*

**P** *Tendinis pars flexoris pollicis breuioris, antequam hac littera primum notatur: deinde etiam posterius, eadem progressus significatur tendinis, ubi cum U, ligamentosa productione prima Q tendinis, coniuncta fuit; unde componitur ligamentum ossis naucularis et cuneiformis tertii ossis posterius.*

**Q** *Tendo tibialis musculi postici*

**R** *Vaginae, tibialis musculi postici tendinis ligamentosae, inferior pars, scilicet, quae sub capite ossis tali extenditur, et necit altiori loco calcis, et nauculare os, et cubiforme.*

**S** *Portio maxima tendinis tibialis postici, siue ligamentum ossis naucularis, et cuneiformis ac metatarsi ossis primi.*

**T** *et \* Portiones duae ligamentosae eiusdem tendinis, e quibus haec in tertio cuneiformi osse subsistit: ista vero altiori loco pergit, ab latere tertii ossis, ad secundum tam cuneiforme, quam metatarsi os; sed haec saepius minus ita distincta occurrunt.*

**U** *Portio ipsius alia, quae cum tendine flexoris pollicis breuioris conuenit.*

**X** *Ossis naucularis, et cuneiformis secundi, ac capitis metatarsi*



tatarfi ossis secundi ligamentum, quod admodum conditur in sinu.

Y Ossis navicularis laterale, et cuneiformis primi ligamentum internum.

Z Tendo musculi peronaei longi, tortus quodammodo, et sublatus; hic cartilaginem oblongam in progressu sistit videndam, quae in via propria  $\eta$  ad cubiforme, extuberrans hoc loco os adplicatur.

$\alpha$ . Eiusdem tendinis pars, instar nerui, ad ossis metatarsi pollicis priorem partem profertur; verum ea oblique surgit ex humiliori loco, et interosseo primo musculo innectitur.

$\beta$ . Eius pars media, et maior, inferiori loco in os metatarsi pollicis desinens.

$\gamma$ . Eius pars posterior in cuneiforme os desinens.

$\delta$ . Os cuneiforme tertium.

$\epsilon$ . Ligamentum rectum, et transuersum, ab osse cubiformi sub interosseis musculis prolatum.

$\zeta$ . Ligamentum pingue et membranosum, quod insinuatur ossium metatarsi capitum et cuneiformium commissuris: nam illud  $\zeta$  Tract. cit. ad hoc accedens, sed firmiter productio vinculi  $\lambda$  est.

$\eta$ . Via tendinis musculi peronaei postici, seu longi.

$\theta$ . Tuber ossis metatarsi exterioris.

$\iota$ . Pars ligamenti calcis longi  $\lambda$  praecisa, quae condit tendinem peronaei, et ultra vaginam ad musculum antithenar pergit; cui ex parte superinducitur.

$\kappa$ . Ligamentum ossis tali, plantaeque latum.

$\lambda$ . Ligamentum calcis, plantaeque longum.



μμ. Productio ligamentosa lati calcis plantaeque vinculi duplex.

ν. Ossis cubiformis, et cuneiformis tertii ligamentum, ab vaginae peronaei tendinis fundo natum.

ξ. Musculus transuersus Casserii.

ο. Musculus abductor pollicis.

π. Musculus flexor minimi digiti.

ρ. Tendo flexoris pollicis in vagina.

σσ. Ossa duo sesamoidea pollicis.

τ. Ligamenta articulorum lateralia.

υ. Tendo flexoris pollicis musculi latefcens.

χ. Tendines digitorum flexores in vaginis ligamentosis.

1. 2. 3. 4. 5. 6. 7. Musculi iuterosseï: et ex his quatuor priores, melioris habendae distinctionis caussa, prae ceteris, ex naturali situ suo, videntur moti.

